



大觀堂文集卷二

暨陽余



奏疏中

時任河南道
監察御史

請復朝覲疏

題為請復

朝覲大典以悉外吏之隱情以察民生之利弊事切
惟三年述職六計弊吏皆古帝王之制也遐方殊
俗不能自達於

朝廷故必合衆諸侯之輯瑞而具詢其實焉所以親

大觀堂文集卷二

暨陽余

縉浣公甫著

奏疏中

時任河南道
監察御史

請復朝覲疏

題為請復

朝覲大典以悉外吏之隱情以察民生之利弊事切
惟三年述職六計弊吏皆古帝王之制也遐方殊
俗不能自達於

朝廷故必合眾諸侯之輯瑞而具詢其實焉所以親

疎逖通蒙蔽也 國家自定鼎以來二十餘年四方安戢萬國牧寧凡諸典禮亦既次第舉行矣而惟是

朝覲大典尚未脩復者或慮地方責任繁重守令遠赴京師未免催科緝盜等事置之悠忽歟且代庖之吏未必清廉恐其乘間掊剋虐民蠹國歟臣以爲此皆易理也而大典不可不舉蓋守令爲親民之官諸如地方利弊小民疾苦苟非至愚未有不諳悉者况其平日果身受督撫之苛求腹削則

必疾首痛心思得一哀鳴於

君父之前而無奈

覲典久廢下吏望長安如在天上不肖上司因得恣意科派多端窘辱守令憚其威權焉得不剝民以飽其所欲蓋前此尚有行取內用之例而近今久停卽春明之夢不敢復作矣夫內外之睽隔如此而欲下情不壅於

上聞德澤不阻於下究其可得乎如是則

朝廷雖日遣軒輜之使巡行郡邑廉問賢否終不若

使守令親詣

殿陛之下瞻仰

天顏口述情狀之較真也何則凡督撫之工聚斂者

必善彌縫彼聞

朝廷有採訪之官則必潑賄夤緣百端哀懇卽鐵面

冰心者稍墮其術中未免遊移顛倒而譽阿毀墨

之說行矣卽令臣等殫心糾察猶多揣摩影嚮之

辭曷若令 覲員畢集時

皇上試宣一二郡縣問其廉貪之狀併地方之疾苦利

弊彼見

天威咫尺敢不據實以對乎夫遐方小吏咸得見

聖天子而言情此真盛世之美舉也况本年計吏之典

將行則

覲典尤不可廢至于爲錢糧盜案計則請 敕督撫

行令本官自擇佐二之賢者報明署攝如縣不足

則以府幕代之總擇廉正之官勿用夤緣之吏而

本官 覲回日一一交盤查訪明確然後具結則

代庖者雖有不肖之心無所用其貪橫矣大典一

行而可盡外吏之隱情悉民間之疾苦似于治安
大有關係伏望

睿鑒俯定

敕部速覆施行

恭請嚴禁畜優疏

題爲恭請嚴禁見任官畜養優戲以遏淫邪之橫
行事竊稽梨園之樂原非風雅正音自習俗旣久
競以聲色相誇而變童妖妓靚粧華服蕩人心思
廢人職業啓淫靡之弊俗滋侈汰之澆風其害有
不可勝言者臣觀近自京師遠及外省優戲繁多
幾等四民之一而在外將軍副都統及督撫提鎮
等官多自畜家樂演習歌舞此輩因得出入營署
恃勢凌人往往索人賄賂騙人妻女官民共懷投

鼠之忌宵人益張狐假之威如臣鄉浙東紹興府有停雲玉蘭等班戲子倚冒提標營勢不分閨女孀婦但訪有姿色者卽擁衆強娶至有斷髮赴水而卒不免者又有樂戶賤人亦恃勢強娶良家婦女以致民間驚懼羞慚數日之內嫁娶畧盡此亦優人奇橫之一端也雖道遠未經確查姓名而惡燄如此使不早爲禁戢則敗俗傷風厲民害政寧有底止乎臣愚以請梨園有必當禁者三譚語醜態導惡宜淫啓庸人蠱惑之志其害一也長髮包

巾巍冠哀袖誘亂人不軌之念其害二也呼朋引類挾寵橫行藉婪官虐弁之威靈爲巨蠹大奸之窟穴其害三也杜此三害伏乞

皇上下大奮乾斷速

敕禮臣嚴立禁條先行申飭督撫

正身率物如有文武見任官私畜前項戲子懸帶某籓某旗牌額提挈某府某標燈籠在外招搖生事者督撫卽行密訪糾叅如督撫不叅許臣等衙門訪實彈劾除戲子治罪外本官并該督撫并行褫黜如是庶幾惡薄淫蕩之風有返朴還淳之日

矣如果臣言可採伏望

宸鑒敕議施行

遵 旨指名疏

題為遵

旨指名具奏事臣於本月初五日具疏為恭請嚴禁

見任官畜養優戲以遏淫邪之橫行事初十日奉

旨知道了該部知道本內停雲玉蘭等班戲子倚冒

提標營勢不分閨女媼婦訪有姿色者即擁眾強

娶及樂戶賤人恃勢強娶良家婦女著指名具奏

欽此仰見我

皇上勤求民隱亟欲禁暴之德意至深遠矣切念臣待

罪言職雖大奸巨逆訪聞既確自當指名直叅矧
區區戲子樂戶何敢稍爲狗阯第浙中距京師
四千餘里雖訪聞最真猶恐姓名偶有未確致開
展卸故不敢遽列奏中臣原疏業已題明今奉
旨着臣指名具奏臣謹以輿論彰著者據實上聞
查得停雲玉蘭等班戲子俱冒稱浙江提標名色
倚勢橫行種種不法難以悉數如孀婦則有遶門
山鄭起龍弟媳姚氏新寡被停雲班正旦吳仲雲
卽伸甫窺伊姿艾強逼爲婚本婦矢志不從毀面

截髮赴水幾死伸甫竟行強娶莫敢誰何伊父姚
茂之伊伯鄭起龍可証閨女則有屠龍卽屠承宇
之女業經許配士人被停雲班金生挾黨逼勒成
親屠龍喊稟知府夏霖拘審間衆優將屠氏從府
門簇擁拉抱而去并將夏知府辱詈不堪全無顧
忌本府案卷并屠龍可証又有草茅橋尉德華之
女被玉蘭班周生強佔爲妻德華可審又有楊裁
縫之妻鮑氏被小生朱仁甫強奪爲妾伊夫可証
又有塔山下朱姓之婦城內舟行被大淨陶祥甫

艷其姿色統衆強奪爲妾本婦憤恚躍入河中仍
撈取奸佔伊夫可証內查有周旦徐生等原係樂
戶浙俗謂之丐戶其種類卑賤良民素不爲婚今
亦冒充戲子圖娶良家婦女以致闔郡駭懼旬日
之間嫁娶殆盡臣所聞輿論歷歷有據者如此臣
思

皇上臨御以來內外大小臣工孰不恪遵法紀而優非
小人乃敢倚冒肆惡如此臣若知而不言則溺職
負恩罪將奚追故不避嫌疑冒昧直陳誠欲懲

一方之淫邪以挽天下之澆俗也伏乞

睿斷敕部嚴行查察并飭各省督撫早圖禁戢以肅
奸暴而安良善實爲億萬世無疆之慶臣因指名
具奏貼黃難盡惟望

宸鑒全覽俯擇施行

權關條禁事權疏

題爲權關旣奉裁併請飭條禁以杜悠忽重事權以防掣肘事竊惟南北各鈔關自明季來官役煩多征求苛細商民幾於裹足矣幸蒙

睿鑒酌量併省卽令監司府倅就近兼收且悉驅積蠹以澄錮弊俾地方無擾商旅通行此誠簡事省官之美政度越萬古者也第 國稅所關係禁不嫌詳飭董察尤貴森嚴倘任事者僅從遙制而局外者槩可傍撓其弊不僅厲商終且虧

國不可不深計也臣本歲自浙東來舟次見權關諸臣未常親駐關上一切收稅事務俱委員役料理甚或令家僮小子輩代爲點查雖云正課無虧而督察未嚴能保用事之人不借端作弊否且淮郡一關道臣身駐其地諸凡貨稅旣經驗收前途似不煩稽盤矣乃自清江浦至夏鎮猶有照票名色關役如林則是清江夏鎮諸關官撤而私未盡撤也且自淮安至夏鎮幾及千里道臣一身能督察於千里之外乎此則條禁未飭之患也至於利權

所在人情不無垂涎前此部差各官專本敕蒞事猶有受制督撫見厄藩旗而不克自行職掌者矧今改任司道而司道不足又改任府佐位愈卑則權愈輕權愈輕則上司又易於欺壓勢要尤易於阻撓萬一貪悍督撫及藩旗貿易之家連舫大舶裝載私貨上虧國稅下累商民權關司道其敢過而問之乎司道尚不敢問而况於府佐之末僚司蓋司道猶不過受制於督撫而府佐并受制於司道苟督撫之賢者秉公持正弊絕風清則司道猶

知顧忌而府佐或能行其志若督撫不無誅求則
司道從風而靡區區府佐一官雖欲勉辦正課而
進不敢失上官之歡心退又自營其谿壑是正課
之外勢必倍取於商人也夫多取則商困商困則
相戒不前而國稅自此漸虧矣此則事權太輕
之患也臣請今後權關諸臣俱令親駐關上其一
切司道府佐衙門事務卽於關上施行而旣撤之
關不許復設吏役照票之名以防需索則條禁嚴
矣若監司府佐權輕不足彈壓應當責本省撫臣

不時提調稽察如有上司欺凌勢要把持之事卽
刻飛章叅處至於叅謁調遣尤宜嚴禁以杜借端
傍撓之弊如該撫有通同朦混及朘削瓜分等情
或被人首告或臣等訪實糾叅宜將該撫重處以
專責成如是則事權重矣條禁嚴事權重而法庶
可永行無弊矣臣待罪言職知無不言倘芻蕘可
採伏望

敕部詳議施行

請集濱海殘黎疏

題爲請集濱海殘黎併移內地兵弁共修耕戰以保疆圉以舒

國用事切自海逆發難以來東南數省蕭然罷敝而遷徙之苦唯瀕海郡縣爲尤甚雖奉 旨按插而守令亦無擴地點金之術上下交困賦稅久虧誠可深慮也 臣思閩浙江東皆財賦之區而沿海一帶延袤數千里其間生齒田賦何啻億萬計苟不亟爲之所恐數年之後灰亾略盡及臺灣蕩平日

大觀堂文集 卷二
始議招徠勸墾亦已晚矣稽自古戍守之法原令兵民相倚明初設立衛所環羅海上所以控禦倭寇雖間有警急而防守甚固未嘗患寇而輕徙也今一望萑葦人烟斷絕而以二三疲卒守禦其間謂可息鯨鯢之窺伺未足深恃也臣請救各該督撫提鎮會同巡海諸臣通計某縣某州海濱界外地長廣若干里有某村落可以屯兵若干某集鎮可以住民若干或卽故明衛所要害之處或另築墩堡烽臺參錯其間一面招集流亾并將內地

無事坐食之兵盡數移屯海上除水涯仍防守嚴禁毋令寸板入海外至可屯種之處兵民各立界限無事則兵耕於外民耕於內有事則兵以力戰民以力守既有輔車相倚之勢自成首尾聯絡之功昔明太祖所稱養兵百萬不費民間一粒米者用此道也第墾荒之始宜寬其征輸戢其暴橫俾兵民歡然有固結之心更簡大帥之智謀忠勇者會同巡海各官時時督察其間則彼濱海之民皆吾赤子也詎肯悖浩蕩之

大觀堂文集 卷二 奏疏中 三
皇恩棄安居之世業而甘心狗賊乎或者疑海波未靖遽議興屯萬一有鷹眼未化者爲之內間則藉寇賫盜將若何臣以爲不足慮也如廣東之瓊州江南之崇明皆四面距海而至今堅守無虞豈閩浙濱海之地獨不可仿其法以防遏耶若慮近海卽有交通而久虛其地詎非自損其丁戶自蹙其境土自匱其財賦乎誠仿古軍屯民屯之法農戰交脩則數年之後守禦益堅賊入必倍不唯兵無轉餉之勞國有增課之益而將來海晏河清卽可爲散兵歸農之漸似亦東南之要策所亟宜講求者也臣從民土財用起見謬抒狂瞽伏望睿鑒俯擇施行

大觀堂文集 卷二 奏疏中 十一
升任復留在任守制疏

題爲詳稽升任復留之例併酌在官守制之因乞
改部臣拘執之成見以杜大弊以廣孝思事切思
臣子効力一官誰不期升遷以圖榮顯至值父母
終天之日又誰不冀解綬以展哀慕之心故赴任
立有期限釋服必待終喪載在會典不可誣也近
因錢糧盜案爲重有升任二三年不得赴其新任
者有離任而仍提回舊衙門者又有提回而以他
事題叅革職者所以地方缺官業聞升補之人而

經年望若雲霓則鑽謀署事之徒蜂擁蟻聚地方受累可知矣至於新官捧檄蒞任在長安中不知費幾許拮据始克就道及到地方滿望接印受事而前官不許離任新官復令改補以煢煢初受之官令往返道途近境已稱勞瘁若數千里之外委頓狼狽其苦累可勝言乎且再入長安未必卽蒙銓補是其守候之苦更甚於在任之舊官也夫推部臣定例之初意不過謂前官未完之事反得赴其新任接任官代爲緝賊帶徵不得升轉爲可矜

耳獨不念後官回部改補之苦更可矜於代緝代徵耶况舊官旣聞升任則人情皆觀望怠弛雖欲振作無由矣曷若新劄初發之官猶有朝氣可鼓而奈何使應行者不得行應止者不得止兩相膠滯坐悞地方之事乎至於丁憂之官聞訃卽宜杜門或有盜案錢糧未完之事權令墨衰視事亦祇應暫展時日俾其速竣未有太平盛世而監司守令咸可奪情留任者此事下關風俗人心上係

國家典制在部臣亦應深思長慮勿貽天下後世之

口實者也臣稽二事俱經臣同官黃敬璣孫錫齡具疏條陳奉

旨該部議奏而部臣執持成見槩以遵照現定則例一語率意具覆此真膠柱鼓瑟之故智也臣思進

退羣吏予奪可否部臣俱應酌量中正之法恭請皇上睿裁以爲行止今部臣全憑督撫之指示而並不

講求

國體稽察吏治同一丁憂升任之官也督

撫以爲宜留原任則竟留原任矣以爲宜赴新任則竟赴新任矣督撫以爲宜在任守制則在任守

制矣督撫以爲應解任終喪則解任終喪矣詘朝廷之銓選徇督撫之愛憎輕

國家之典制重大吏之威權部臣可謂顛倒失倫矣夫升任之官固有失歡於督撫而故爲稽留者亦有新任荒疲不若舊任之美而賄求督撫謬報未完以爲戀棧之計者丁憂等官有因父母病故哀求終制而督撫索賄不遂忽以別案繫維令不獲去者亦有貪戀地方全無哀戚而媚求督撫留任守制俟逡巡服闋併免赴補者在各官雖有賢不

肖之異而揆督撫留任之心總未有出於公道者也使出於公道則豈不知部臣銓轉一官必查明錢糧盜案全完而後升授既升授矣卽偶有未完何難令新官接緝帶征而必令舊官復回新官復去紛紜不憚煩乎至丁憂之官方寸已亂何堪久理民事且方今英才濟濟焉知新官之不必如舊官而必使凶服不祥之人覲顏仕途久妨賢路耶

臣請

嚴飭部臣詳議各官去留之法必如何而後至公無弊如何而後新舊咸宜如何而後無悖倫紀務因國家大體起見從長打算勿徒徂一時偶行之例而牢不可破致天下視

朝廷之升擢不如奉督撫之去留遵

國家之典禮不若按有司之條例則所裨官方吏治風俗人心非淺鮮矣臣因條陳留任事理語詳字多貼黃難盡伏望

宸鑒全覽俯擇施行

河勢變遷疏鑿宜先疏

題為河勢變遷日甚下流疏鑿宜先謹陳末議以裨大工事切惟河漕為天下大命而天妃聞係黃淮合流之地尤南北之咽喉也自烟墩口既塞之後黃家嘴復潰而漕艘益梗矣河臣拮据任事固當有成算以奏膚功第是役也

皇上宵旰靡寧三省民力殆竭而決口猶未報竣苟懷

一得之愚何敢嘿嘿已乎臣思河之不循故道者

由下流填淤也下流填淤則水不通利故洪流暴

漲非潰而南卽潰而北勢使然也查本年五月間
河臣直陳黃河底墊等事一疏內稱黃河盛漲驀
越淮河淮水返退湖內河沙逆上勢若排山亦因
黃河墊高不復循軌等語由是觀之則下流填淤
不能順行入海亦已審矣矧今黃家嘴衝刷日深
則河之故道益高徒欲捲埽築堤挽建瓴之勢與
淮合流此不可得之勢也黃淮不合則漕輓何從
北上計惟有先鑿下流使海口通利而後導黃合
淮上游庶保無虞漕渠亦克永濟耳不然則水無

所歸而遽絕其去路卽使堤埽幸成來年復秋水
發他處必復潰決是以有限之民力與大河爭勝
負也詎萬全之長策哉臣請速論河臣細閱情

形從長酌議趁此決口未塞水方伏漕之時調集
夫役將天妃閘上下一帶老河故道挑濬深廣俟
開挖旣成然後將黃家嘴決口上緊捲築一面開
放大流注入新渠則水得所歸而工程堅固當無
衝潰變遷之虞庶幾國漕永賴民困漸蘇而河
臣之勞績亦足仰答

大觀堂文集 卷二
宸恩矣緣係條議河工字稍逾格如果臣言可採伏望

敕部立議施行

閩兵宜戢疏

題爲閩盜固宜亟除閩兵更宜速戢謹陳密策以靖殘疆事切唯閩南諸郡山海相聯向稱逋逃之藪不可不慎防也臣見福撫劉某漳屬盜賊劫擄

頻聞等事疏稱漳郡窮黎爲盜固多兼裁移兵丁逃匿烏合等語臣思小盜者大盜之囿也矧漳屬密邇海逆勢易勾通倘不及時剪除爲害滋大請敕新督臣兼程受事早行撲勦諒茲烏合之衆無難殲滅也唯是平盜之後臣猶有深慮者我

皇上念閩省兵多累民故令裁老弱移投誠皆救寧地方之至計向令奉行盡善所裁者盡是老弱所移者不致驚疑亦何至相繼逃匿歟今旣往固不可咎而將來必宜熟籌臣請合閩省京制之兵與投誠之兵通行選汰其老弱者編入里甲勒令歸農其精壯者查額兵空伍悉行頂補大抵客兵十之七土兵十之三則勢足以相馭情足以相聯俟有調發新舊竝遣上無督遷之名下無猜懼之患寧更有竄逸嘯聚者乎至投誠各弁不應仍轄舊兵

果有才勇傑出者宜令該督確查具

題或改授外省或調補別鎮以豫防萌蘖卽大帥不便輕裁亦當以河朔援兵易其部曲蓋遷移以漸則衆不驚更調有方則餘患息似亦善後之要圖也臣因除盜戢兵謬抒狂瞽事關軍務密具疏陳伏望

睿鑒酌擇施行

直陳民隱疏

題爲直陳民隱亟請立法勸輸以圖豫備事切惟
皇上臨御以來各省年穀豐稔卽間有水旱之區而南

北米價甚賤宐民皆含哺鼓腹矣乃細察閭閻尚
有深憂未釋者一慮官糧之逋欠一患私貸之責
償也蓋民間止有米粟而無金錢變價輸納則鬻
糶者多商販者寡故有穀賤傷農之說其實非穀
賤也由民貧急於求售故無關價值耳臣思秋成
豐歉難以恒定小民亟目前之計無暇爲蓋藏之

大觀堂文集 卷二
謀萬一偶值災祲則今日之粒米狼戾卽異日之
半菽不飽者也非早爲畜儲何恃以無恐乎請
敕各督撫設法勸輸凡州縣常平豫備等倉及今米
價平賤之時不拘官紳士民有能納米百石以上
者照本歲三省賑饑之法分別多寡定例獎敘卽
令就近輸納冊報彙題更新

天語申飭務期實心奉行嚴加稽核勿令吏胥鼠雀
恣意耗蠹則不惟民間緩急有恃而庾廩充實足
支數年卽有堯湯水旱可無意外之虞矣

臣從民

隱起見謬爲先事之圖伏望

睿鑒採擇施行

撫標理宜酌復疏

題爲督臣旣經裁併撫標理宜酌復請

敕部詳議以固封疆事切稽舊制巡撫統轄軍民保障全省故設標兵以資彈壓所關至鉅也自前此各省俱設總督而撫標似屬無用故議裁以節冗餉此特因時制宜而非永久之定例也今楚屬督臣旣撤而各省亦皆裁併則較前控制之勢業已不侔時宜變通可無綢繆之要策乎計天下總督六員巡撫一十八員除同城共事者無庸更議外

如蜀疆險阻甫經戡定楚湖南北相距甚遠中間雖設提鎮而汛守各方鞭長不及恐緩急未克有濟此撫標之首應議復者也至浙閩逼近海隅西粵獨鄰交趾甘肅之孤懸絕域黔中之密邇苗蠻晉省係神京右臂而口外卽接蒙古山左爲負海岩疆而前此屢經兵燹豫章澤國萑苻時聞南粵災荒鯨鯢未息安慶有操江之責蘇郡爲財賦之區河南界聯七省直隸控制三關凡茲諸撫皆任封疆重寄與總督各城分閫而徒挾節鉞之名

所部兵不滿百何以壯威重而銷萌孽歟此撫標之必應議復者也或謂軍需孔亟時方議裁一旦遽復撫標獨不爲糜餉計歟不知兵有必當裁有必不可裁必當裁者如支郡下邑零星隸食之兵有無不足重輕必當裁者也若撫標之兵非守禦會城則防扼要地所關至重餉苟未敷猶當節彼以裕此况以撫標原設之兵仍歸該撫則兵不募餉不煩增營舍不煩葢造而控制之勢已鞏固於不拔此必當復而不可裁者也第省分有大小

地方有邊腹而距督臣所駐亦有近遠請 敕部
詳定先將楚蜀三撫標作何議復其餘督臣雖并
未撤者作何遞減至窮邊荒徼形勢可虞及距督
甚遠不能兼顧者更作何增設務期籌畫至當輕
重合宐於以恣彈壓之威而銷窺伺之釁似于封
疆大計不無裨益也緣係條議撫標事理字稍踰
格如果 臣言可採伏望
睿鑒俯擇施行

屬國効順疏

題爲屬國之効順旣誠流戶之來歸宐早恭請
敕諭遣還以永安邊境事切惟廣南國密邇粵省自
明季寇亂中華士民流寓彼境者以億萬計此輩
俱有親戚墳墓今聞故鄉康樂誰不翹首思歸其
無賴者或因生還無策甘爲戎首因而潛跡海舶
窺伺疆圉者有之雖不足爲地方大患而綢繆未
然似亟宐招復以杜奸萌者也 臣查上年廣督周
疏稱該國送還都司劉世虎一案其護送三十六

人盡係江南等處人氏竝無廣南國一人雖事情可疑現奉

旨確議然據此可見中土之民留滯彼國者何可勝計矣若不及今責令來歸勢必終淪異域萬一狡黠者因思歸之衆生事海疆如明季徐海汪直等流毒東南該國能常爲捍禦乎臣請乘伊歸附之誠勉之送還之義特

賜璽書顯加褒勸凡各省流寓人戶如趙文伯等願歸故土者

諭令該國王悉行查遣還籍倘有疆吏借端留難奸徒違法窩藏該國嚴行禁治俟流亾盡歸之日許加

懋賞以彰効順如是則不惟流離赤子咸歸故鄉將來奸宄之根株永杜屬國之推戴益堅而

天朝威德更遐播於海外矣臣因事關疆圉謬抒末議伏乞

睿鑒酌擇施行

請嚴保舉疏

題爲請嚴保舉之法以收賢能之實效事欽惟

皇上求賢若渴知資俸不足以盡人才故緊要員缺俱
令部院保舉賢能而諸臣亦各以推進爲務一時
師濟休風誠足度越唐虞矣臣思

皇上不恃知人之哲而俯詢諸臣諸臣不昧緇衣之好
而薦賢爲國固非無據而云然也第揆諸保舉之
義似尚有未盡者臣請詳言之夫保舉者所以保
其賢能也其人果賢且能則異日居官蒞政斷無

敗類不肖及悞國殃民之事故不惟舉之而且保之也既保舉矣異日試之而驗則保舉者應受進賢之賞試之而不驗則保舉者應受連坐之罰故保舉之法不必堂上官盡署職名也惟知之深信之確者或一人獨保數人或數人共保一人應將其才品據實直書末署臣某保舉其狀存貯御前以爲異日賞罰之案如是則保舉者不敢徇私賢能者不敢奔競是

皇上合諸臣之耳目爲耳目公聽竝觀而真才可盡得也今臣見部院所推賢能尚未開有保舉字樣不知所推之人果皆知之深而信之確乎抑亦姑舉以待試耶夫

皇上開誠以信諸臣諸臣安可不求確信之賢能以報臣請今後部院所推之人宜更加慎度果係知深信確者卽宜實署保舉職名以仰副旁求之典如保舉後其人變節許舉主先首免坐若疑信相參者不得雷同附和以干日後濫舉之罰如是則法嚴令斷而公道大昭人人以

皇上之心爲心賢能自有實效矣臣因保舉大典所關至重謬效芻蕘字稍逾額伏望睿鑒俯擇施行

督撫互糾疏
題爲遵

諭敬陳請立督撫互糾之法以肅吏治而救民生事切惟民生之安危視吏治吏治之貪廉視督撫我皇上鑒之至詳矣今督撫潔已愛民正身率屬者固不乏而奇貪大惡者亦復不少乃數年來曾未有總督叅一巡撫巡撫糾一總督者互庇如此欲望其澄清吏治拯救生民寧可得乎伏讀上諭晝夜深思惟有督撫互糾之法似乎切實有裨

也何則通省之官莫尊於督撫下之藩臬守令稔
知其奸貪而不敢發者誦於勢也內之部院科道
欲發其奸貪而患不盡實者遠於地也惟督撫勢
均地近易相糾察而前此互相狗隱遂成牢不可
破之勢者何也向無互糾之令彼此競爲貪黷卽
有秉正嫉邪者亦以素無成例不便翔舉况締交
旣深敗不相及則亦務求容諱爲得計耳安肯公
爾忘私獨絕情面者乎臣以爲窮督撫之奸貪非
令自相糾發無從盡得其隱欲令自相糾發則必
嚴立條例如借名巡歷大肆誅求及佯示禁除隱
令加派之類俱著察實糾舉如敢仍前曲爲狗隱
者事發一體連坐如是則奸狀易彰莫能掩匿雖
欲巧相倚庇以圖腴削必有所顧忌而不敢矣督
撫無敢倚庇而藩臬以下尚敢託餽獻以漁獵小
民者未之有也臣恪遵

上諭謹據所見伏望

睿鑒俯擇施行

嚴禁私鹽疏

題爲請

旨嚴禁私鹽以免

國課壅滯事

臣

等奉差長蘆到

任以來查得私鹽與販官鹽壅滯引日不能銷完
皆由直隸所屬順天永平保定河間府等處住居
奸棍滿州庄頭放馬人役并投入旗下者結夥百
餘盡騎驢馬牽帶牛車各持器械拒敵衙門捕役
將嚴鎮海豐蘆臺等鹽場之鹽販出強佔貨賣又
與滿州庄頭土豪奸棍結聯將私鹽窩囤伊家竊

賣州縣捕役畏其滿州家人威勢不敢捉獲故私鹽甚多官鹽壅滯七八年鹽尚未賣完而州縣各官又因每年鹽引不完之故以致

題叅俱停陞轉商人不敢將國課虧欠年年借債上課苦至極矣私鹽之法雖前已禁過但藏鹽窩主及左右鄰舍該管之人不治其罪以致私鹽盛行今滿州庄頭并放馬人役等販賣私鹽并接引到家窩囤者其主子佐領分得撥什庫小撥什庫屯撥什庫并本犯鄰佑治以何罪其兵民與販窩囤者該管官及總甲鄰佑人等亦定以何罪傳示八旗下併包衣牛录直隸巡撫總兵官協同臣等嚴行禁止庶私販之路杜絕官鹽之路不壅商人亦得疏通州縣官鹽引年年可以銷完亦不致悞陞轉矣如果臣等所言不謬伏祈

皇
上勅部議覆施行

認地行鹽疏

題為 題明認地行鹽代銷懸引之例仰祈其

敕部詳議畫一以便遵行事康熙九年十月十一日

據長蘆運司遲日豫呈據商人何清王瑞等連名

呈稱切照課完于商引銷于地惟地認不清則引

因之而告減課因之而告誦勢所必至如定州等

處告減四萬餘引此地既減何地可增因無可增

之地則引屬懸矣再如孟裕等商乏遺萬餘引

此商既逝何商可代雖權加之商等終非定著則

引亦爲懸矣以八萬懸遺之引責于商等兼值私
縱鹽阻之日財窮力盡之餘卽自身額課尚在揭
措難完又焉能桃僵李代若不亟爲設法酌併則
今日現在竭蹶之數商焉知不爲異日之逃乏者
乎因思減懸之引良由地認紛亂不清批商去留
不常煎販橫行不禁所致如地方有向來商等舊
認一定者九十餘處苦樂自甘趨避永絕急公告
運殫力緝私每年額引全完歷來案簿可考其夥
告八十餘處有利則趨無利則避以致告無耑責

私販盜起官引坐壅有司受考成之累如定州等
處批減之引是也課無額認批撥負逋支商受奸
騙之險如孟裕等商逃遺之引是也今商等矢公
僉議無如循例將夥告八十餘處一如舊認一定
者責商歸併耑認俾地方有耑責承認引有耑責
告運而課亦有耑責完納引地旣清仍將批減之
遺之引均責在各商名下自認地方作額完課仍
責在于各所自認地方溢額告銷如斯則官引不
督自運私鹽不禁自戢法紀畫一鹽政肅清等情

大觀堂文集 卷二
據此該本司查得長蘆額引七十七萬餘引其引分銷于州縣其課責納于諸商是無容減懸者今查批減定州等處四萬三千三百七十九引與乏商孟裕等懸引三萬八千五百四十四引共計減懸八萬一千九百二十三引矣事關國課勢不得不責之見在各商完納但每逢限比苦苦告艱且私販橫行半由于夥告地方事無端責所以日益充斥官引亦因之而告壅今據衆商公呈新併循如舊認地方之議竝請均派批減乏商懸遺之

引各在于自認地方帶銷私販自絕官引自疏等因呈詳蒙批據詳歸併八十餘處循例而行似矣第查此例起自何年行因何事曾經奉何批詳有無具題達部併于衆商有無累害國課有無裨益日後有無流弊該司逐一詳查妥確立速具文回報以便酌奪此繳蒙此該本司復看得長蘆額引七十七萬餘引行銷于各州縣衛堡共計一百八十餘處內如薊永儀封宣引俱經前院題定專認者如灤縣營保安州等處有詳蒙前院批允

及商人久經認定者則九十餘處向有專商承辦所以引課按年完銷從無遺欠惟昌平等州縣夥告八十餘處因事無責成以致引壅課詘自康熙五年間陞任周運司任內諸商卽議併認行鹽迨奉行三載各商多有紛更不一至康熙七年間李運司任內各商又議復併俱經詳蒙前院批允刊刻成書卽爲遵行矣及本司到任後屢據衆商呈稟復以夥告地方引鹽趨避不一正課因而不前且批減及乏商懸遺之引至八萬有奇若不亟議

需商承辦則國課必致有虧第查併認之舉原非創行若責成旣專則趨避可杜懸引有著則額課無虧此誠有裨于國計有利于商民而實無累害也至于日後有無流弊本司查舊認九十餘處每年引疏課裕行之已久今將夥告八十餘處照舊認歸併之例責成實力奉行是屬有利無弊今蒙批查合再據實詳覆伏祈上念國課下憐商困俯賜具題俾令永爲遵守等因本月二十二日呈詳到_臣等據此該_臣等看得蘆屬行鹽州

縣原衆商夥告自前此地方消乏引壅商逃前任
鹽臣節據司詳責今商承辦將批減懸遺之引
各于自認地方通融代銷從此剗永儀宣等專認
各州縣計九十餘處年額年銷頗稱利便惟夥告
昌平等八十餘處地無專責以致趨避不一正課
因而不完故該運司遲日豫仍據商人何清等公
呈詳請欲照前例責商併認俾課有專辦鹽無越
行庶幾趨避永杜懸引有歸等情臣等慮有違礙
復行駁查今據司詳舊認歸併等處每年引疏課

裕行之已久是屬有利無弊第前此未經具

題故猶有紛更等語是專認歸併之誠課商兩便

疏引裕國之要務矣臣等查欽奉

敕書有博採利弊斟酌損益及敕內開載未盡事

宜聽爾等酌便請行之

旨故凡有裨商民國計不敢不以

上聞爲此理合具題伏乞

敕部詳議施行

大觀堂文集卷三

暨陽余縉浣公甫著

奏疏下 時任河南道監察御史未奏稿附

錢糧收解之弊疏

題為直陳錢糧收解之弊請 敕部詳議變通以
杜加耗之源事切惟 國家有丁地則有賦役有
賦役則收解錢糧之事皆賦役中事也何可諱役
民之名而行厲民之實乎

本朝深恤民艱初為吏收官解之法法至善矣然行

之未幾諸弊叢生名爲吏收而吏未嘗收名爲官解而官未嘗解其收之解之者皆百姓也夫錢糧收解旣由百姓而有司何以借端加耗派索益繁則由吏收官解之名有司得以藉口耳臣稽古制編徭之法里甲十年一輪總以本甲地畝之多寡定徭役之輕重故值櫃解糧必擇殷實戶丁身家自愛者爲之雖收解不無勞費而以一歲之勞費得九年之休養故民不告匱有司惟據案較閱簿書自拆封秤兌查比批廻之外全無所預雖貪吏

無從染指此民收民解之便也今有司以吏收爲名僉點櫃吏吏非衙門積蠹卽係市井遊民錢糧一經其手強半花銷遂致掛批壓欠包賠攤派苦累里民謂之帮貼重加納戶謂之補征此一害也有司以官解爲名因借傾銷添搭等陋規或陰勒櫃頭恣收重耗或巧緣名色私行加派年年如是里甲無休息之期此又一害也臣思國家立法本以利民而流弊之害如此可不亟圖拯救之術乎然救弊非難惟正其收解之實去其官吏之名

可矣夫使吏果能收官果能解名安可去惟以民
收民解之實謬託乎吏收官解之名而又藉其名
以朘削民膏則其名安可不去而賦役之法安可
不求變通也臣請 敕部詳議或兼咨各督撫叅
酌時宜訪求古法務先去虛名除實弊俾有司不
得藉口以肆貪漁庶幾上慰

宵旰下拯疾苦較之叅劾繁而加耗日甚者得失相
去遠矣如果臣言可採伏望

睿鑒俯賜施行

銓司成憲疏

題爲銓司有必遵之成憲請除變更七大弊以正
用人之本事切惟 國家大政首重用人而銓司
者又用人之根本也前此秉銓者紛更成憲我
皇上赫然震怒電掃霆除旬日間煥然丕變矣然臣以
謂成憲之大者莫如銓司之官制誠取銓司之變
更者亟除之而其餘官制次第就理矣查今日銓
司之制異於

世祖皇帝時有七臣請悉數之舊制銓曹必極一時

之選漢人非登進士有盛名者不得與焉今則一榜明經皆濫及矣變更者一舊制四司每省各用一人以周知同籍之賢否故資俸之中猶存鄉舉里選之意今則不分直省一槩引用多者一省或至數人少者數省全無一人矣變更者二向有每歲甄別之例內升外轉各一人故咸以名節自持畏苞苴慎請託今則停止甄別不復有杜門謝客者矣變更者三至於考選之例內則中行評博外則行取推知必由本部具題考選非俸深薦多及

素有清通之目者何敢過問今則部員州縣平升徑授矣變更者四舊惟試差遣副郎餘無馳傳外省者今則鹽差關差雜然並遣矣變更者五吏部之不轉別部尊天官也尚書爲六卿之長禮殊百僚則曹署亦有定體矣今何以四司員外與別部較俸並轉也變更者六至文選司郎中舊稱選鈞不惟五部郎中不敢妄覬卽本部三司正郎亦必推擇品望至優者需次良久然後授之其人亦不敢遽受也引嫌遜避不獲已而後受之是豈謬飾

大觀堂文集 卷三
歟謙讓者所以砥奔競恬淡者所以挽貪風也今則五部雜升朝聞而夕至無復慎推詳擇者矣變更者七凡此七弊皆由阿思哈剛復執拘恣意妄爲遂舉 國家良法美意紛更殆盡今其人雖戮其弊未改恐將來銓政因循日久遂使用人之地無復澄清其餘官制何由悉符成憲 臣請 敕部先將銓司事宐悉心詳議務合舊章其餘朝政次第脩復則政本治而人才與 國運竝興矣緣係條陳字稍踰額如果 臣 言可採伏望

睿鑒施行

特糾溺職疏

題爲特糾溺職道臣以肅漕政事切惟漕糧爲

國家第一重務故各省俱設糧道以司董察任至重也任其職者自應釐奸剔蠹盡絕弊端始爲無負乃職若平時不能正身率屬而所屬奇貪大蠹又絕無報聞國家亦何賴此監司而任其貽悞乎臣於蘇常糧道盧某有甚可駭者查前此總督屈撫臣韓疏叅丹陽知縣路望重科徵六年漕糧每石派銀六分共銀二千餘兩又派心紅銀六百

餘兩二款狼籍甚矣乃當揭報者惟臬司知府而該道之耑司漕務者反未聞也猶云偶失發覺歟及今督臣麻 疏叅宐興知縣高標徵收七年分漕米漕兌未開先繳耗米二百石又勒厥書銀共五百四十兩此皆漕政大弊該督撫已據藩臬府揭報糾叅而該道仍無發覺也夫漕政莫重於蘇常蠹弊莫大於私派該道專任其官身處其地而一任貪蠹橫行前後總無開報不知所司安在若知而不報是狗庇也不知而不報是昏庸也溺職

如某猶可令其安然尸位乎

臣

繕疏甫畢又見撫

臣韓 漕船裝運白糧等事疏稱船丁行月之外勒借添篋提溜等項銀米而後裝行水手復逼工價鼓衆停撓等語已奉 旨該督撫嚴拿究擬矣

臣思船丁措勒固爲不法然令該道能先事綢繆亦何敢刁橫至此如添篋提溜等項果應借給卽當預請動支如不應借給卽當嚴行禁止何待其鼓衆橫肆始畏而曲從耶卽此一端其鄙懦無能已可槩見又安望其釐奸剔弊彈壓旗丁也 臣聞

該道貪穢衰庸悞漕非一茲就其罪狀之顯著者
據實糾叅恭請 敕部嚴加察議以爲徇縱不職
之戒漕政庶有起色矣緣係糾叅事理字稍逾格
伏乞

睿鑒施行

請廣開屯疏

題爲邊地旣應耕墾旗藩似安竝給請廣開屯之
制以瞻餘丁以固根本事切惟

皇上軫念直隸圈地之苦 諭諸王大臣會議將邊外
空閒之地撥給旗丁耕種已奉

旨依議矣 臣思各旗聚處 畿輔生齒日繁非移屯

口外將來誠有人滿之憂况邊外膏腴久成棄壤
今令移居耕牧則人畜兩獲其便洵治安之上策
也第荒地甚多旗丁安能盡墾查遼西寧錦一帶

大觀堂文集 卷三
距奉天不遠尤 本朝開創之始基也 國初南
服未靖暫徙藩封以資征討而關外遂致丘墟今
閩廣滇黔久已大定藩下生齒亦日繁矣聚數十
萬衆於海嶠蠻荒之地而不早圖資養詎善後之
良法乎况南方地隘人稠民無作業與其需有限
之餉贍日增之丁曷若以能耕之衆就甚曠之土
臣請 敕部并議除各藩經制兵馬及有田可贍
者仍應留禦外其餘退閑官弁額外壯丁及支子
族屬有願居關外者俱應照各旗例造冊咨部撥

給地土以資養贍則地無棄利人有餘財矣第久
荒之後墾闢維艱其蓋房置器牛種行糧等項資
給似宜優厚并請省其調發寬其地畝以示休養
之恩則人情樂赴而旗藩各有世業人士竝皆生
財太平根本之謀寧外是乎 臣 推廣

上諭俯竭芻蕘倘言可採伏望
睿鑒俯擇施行

恭陳四願疏

題為講武固為盛典起居尤宜慎重恭陳四願安

聖躬以安天下事臣聞

皇上於今農隙之時欲行巡狩之典各旗官兵業已

秣馬擐甲戒期啓塗矣臣思講武大閱原係古禮

况上年宮車一出近郊之民咸被恩膏歡聲

雷動臣雖下愚知

皇上切念民生未嘗以遊畋為樂也第

天子舉動史冊必書

聖躬所臨嚴稱 警蹕則時巡固不可止而 起居
尤不可不慎也 臣 區區犬馬之心切有四願敢爲
吾

皇上陳之一願合圍之時

皇上勿親射猛獸昔漢武帝好射熊刺豕納司馬相如
之諫而止今其書具在可爲明鑒况格軼材之獸
以示武猛此材官力士之技也

皇上選拔驍果寘諸侍從已合天下之勇爲

皇上之大勇矣射飛逐走寧足煩

聖體乎一願 行在所至

皇上勿輕騎微行夫清問民間廉訪吏治固

宸衷所宜加意第草野愚賤不知

至尊之體而地方奸宄懷謀叵測往往有衝突儀仗
者語云白龍魚服困於豫且此皆不可不深慮也

臣 思前代人主高拱深居故下情患不上達今吾

皇上一歲之內數與吏民相見但使 駐蹕之地引見

高年有德之人詢問疾苦採訪政治自然隱微畢
照矣若荒阻林莽之區

聖躬幸無輕歷也一願

皇上迴鑾及早以恤羣情臣見科臣趙一疏奉有田

獵原以講武竝無糜費錢糧勞困民力之

旨臣思

皇上節儉愛養固未嘗輕費財力但

御駕一行千乘萬騎咸扈從以往離京稍遠裹糧

漸艱萬一露宿日久士馬饑疲當亦

皇衷所深惻也臣思講武之禮在乎蒐討軍實不在

乎馳逐田禽倘典禮已畢似宜早迴

御駕以體恤內外之輿情也一願

皇上慎擇居守以悅

兩宮京師者天下之根本九門鎖鑰八旗將領督察

雖各有人而

大駕躬巡則防禦尤宜加謹而

太皇太后暨

皇太后慈愛惓惓寧忘頃刻臣知

皇上雖臨幸郡國而定省之思亦未嘗頃刻忘也臣請

慎擇親王大臣加意料理防察非常上以悅

兩宮之心下以釋臣民之慮

聖躬安則天下安矣凡此四願

臣知

皇上必熟審而豫圖第

臣

區區愚悃私憂過慮誠結於

中無敢緘嘿字多逾格倘芻蕘可採伏望

睿鑒留覽施行

外官告病一體疏

請更外官告病之例以一內外之體收人才之效
事切惟

皇上統御羣工推

恩內外罔不一體誠以臣子驅馳

王事爲

國宣猷原無分於遠近也乃

臣

查舊例

京官告病

病痊之日原官補用外官告病則令休致不准補

用

臣

思同一病也何以

京官之病應准補用外

官之病獨不准補用乎意者外官有規避地方託病求免故以此示懲者歟如果託病規避則當明正其罪或革職或降調不應准其告病矣如果真正患病則情非獲已俟病痊之日亦應照京官例原官補用何可獨令休致耶况

國家立法均平內外人才總屬一體卽註誤罪廢之員猶許辨復起用矧茲患病等員原無過犯或因一時勞瘁傷感遂致終身廢棄揆厥情由當亦

宸衷所憫惻也

臣請

敕部詳議凡嗣後外官告病應察明果係真病非屬規避取有驗勘官印結併醫生結狀存案者似應

照京官例病痊日原官補用以昭

皇恩一視同仁之義倘係荒殘地方疑有託病規避等情則病痊之日仍補原任可耳蓋

皇恩無間於遐邇人才不終於淪棄破從來拘牽之苛例成

聖朝特達之曠典端在此矣如果臣言可採伏望睿鑒俯擇施行

江南藩臬疏

江南藩臬不宜分駐請酌定會城以重職掌事切
國家分設各省自撫臣而外其職掌重大無過藩臬
兩司蓋以通省錢穀刑名唯兩司實竝專其任故
撫臣倚之如左右手必得同處一城朝夕商確而
後呼應俱靈事無耽閣倘分居兩地徒藉文移往
來恐經旬累月卽有敏捷之才未免曠時誤事矣
臣稽江南二撫臣蘇撫駐蘇郡而臬司駐江寧相
距旣已太遠至安撫駐安慶而藩司駐江寧旣隔

大江又非本屬諸凡徵解錢糧提審案件檢勘災傷察報賢否其便與不便臣雖不敢遙度而以情勢揆之似非相宜之策也何則地方政務緩急難以豫期今撫臣不能與藩臬面相咨議則庶績之舛謬必多曷若同處一城如臂指相使之爲善乎或謂督臣駐江寧而無藩臬則制閫之體統不尊故江南江北各分一司以備任使似矣殊不知藩臬職掌雖分而實以相合爲用者也今江北無藩司則安撫之錢穀問之何官江南無臬司則蘇撫之刑名寄之何人卽督臣有兩司官而藩司不知江南之錢穀臬司不知江北之刑名猶之乎非全省也況以江北之錢糧返輸解於江南蘇郡之刑獄更赴質於江郡道途遠涉艱苦倍常有殊不便者乎臣愚謂督臣職掌原重軍務至於錢穀刑名兩撫臣已分任之矣藩臬兩司似宜各令與撫臣同駐以便辦理職掌者也如果臣言可採伏乞

敕部詳議施行

江督宐居要地疏

督臣有宐居之要地請酌形勢以固疆圉事切唯
國家念江南爲財賦根本之地前以海隅不靖勢幾
燎原故於會城設督臣以爲肆應之策而於京口
復設將軍以重其彈壓之威誠欲使犄角之勢成
而賊氛永息也顧形勢有緩急之分而號令有偏
全之別審其要而圖之則不煩增兵糜餉而氣勢
強固可坐操全勝矣今督臣雄據上游雖曰形勝
之地然以全勢論之則南北咽喉江海門戶莫過

京口爲最若督臣開闢鎮江以重兵控制要害則
氣勢聯絡與南北撫臣江淮提鎮互相首尾又有
江寧將軍與總漕臣爲之聲援調度策應之便莫
善於此矣如是則京口將軍似可併撤何則督臣
總統文武兼督滿漢較之將軍止領各旗兵將者
其事權不侔其機宜亦絕遠也或謂京口距江右
稍遠似於統轄稍有不便不知督臣常有節制三
四省者况江右係腹裏之地何難兼顧歟蓋攬勢
可以操勝而扼要斯能制遠不然而備多者力分

地偏者威紂非策之上也臣從江南形勝起見謬
陳末議倘言有可採伏望

敕部詳議施行

請分未完輕重疏

爲請分未完之輕重以便責成事切唯錢糧上關國課盜案下係民生故各官考成唯此爲重雖陞遷等官必詳查有無未完者誠重之也第事有大小情有輕重若不分別等例一槩名曰未完則有大不可者如一錢糧也有官役侵欺者有那移前絲者有舊官逋欠新官帶徵者有地方荒殘民逃虧者有賦役繁重民力不支完至八九分餘雖進呼鞭撻終不能完者又有藩司自顧考成將州縣

現年所解之糧改爲前官舊欠而現徵返致缺額者有欸項不過細微而作爲十分考成遂稱掛欠者一盜案也有山海大賊破寨擄掠如廣東之潮陽縣諸案者有營兵爲盜拒捕對敵殺傷汎弁者有名城大邑公然劫殺而捕役防兵相顧不敢追者有窮村僻路剪徑截奪者有鼠竊狗偷因失主窮追拒鬪傷人者有流民饑窘伺隙搶擄旋卽奔竄者諸如此類苟不分別輕重大小槩稱未完則侵那鉅萬與疎縱巨寇者不過循例降級而細微

尾欠及零星小盜之未獲者竟爾同科似非情理之平也

臣請

敕部詳議將前項未完俱分別大小輕重以定處分其重大者立行題叅其輕小者竟免降級則涇渭清而吏治肅矣抑臣更有請者催科之政原屬有司討捕之責應歸防弁蓋有司所轄者不過捕役鄉保其力能制小盜不能禦大寇彼千百成羣之賊防守將卒尚不能勦捕而欲責之文弱之吏豈通論乎况將弁知地方失事文武並懲則卸過

之心生而任事之念寡此盜賊所由無忌也臣謂
強盜二十人以下者應有司防弁同緝不獲均處
如過二十人以上則非捕役鄉保所能討擒雖均
應承緝而責任應端歸汎弁有司如遇陞遷理應
免其降級蓋輕重允宐而文武各盡乃職自然盜
息民安永致太平之效矣臣因錢糧盜案情有重
輕謹陳芻議伏望

睿鑒俯賜施行

請復養士之禮疏

請復養士之禮培學校以勵人才事切唯

皇上重道崇儒特舉

臨雍大典又復八股之制廣鄉會之額四方髦士
靡不蒸蒸向風矣顧臣聞之漢臣賈山云地之美
者善養禾君之仁者善養士今仁如

皇上養士之法安可不備夫養士者何養其廉恥也士
有廉恥而後學校尊人才盛然所以養其廉耻者
安在在

國家待士之禮

臣稽

世祖皇帝時各學生員非犯法革黜雖督撫不得加刑以公事拜謁則督撫降榻爲禮其餘司道府縣體貌甚優卽有罪應禡亦必先申學道除名然後許加扑責未有無故榜笞嫚罵視如奴隸者也自前此一二劣生抗糧獲罪始令有司責治自此貪殘之吏借端欺凌擅作威福覘諸生之溫飽者恣行挾詐無復顧忌稍有違拂卽誣以不赦之條鞭撻鎖繫窘辱異常諸生惕於

功令雖至破家隕命莫敢申辨如近日直隸撫臣金世德疏叅知縣胡一蛟因生員趙廷扑等言語激觸遽誣叛逆遂將三衿酷刑慘死現奉

旨革職提問此其明驗也夫直隸如此况外省乎縣令如此况上司乎故今日學校之士不唯有司賤之之卽輿隸小人皆蔑視之矣然士雖賤而詩書之好進取之心猶無異於疇昔者則知有司賤之而皇上未嘗不重之也故恩詔一頒士之觀光太學者接踵而至園橋俊彥盛越西京由此則知諸生孰不

急公尚義愛慕功名詎肯以欠糧細故自罹法網
乎唯貪吏摧折之餘賢者無由自奮中材以下廉
耻道微矣夫

國家養士將以期異日之用也乃侮蔑至此異日安
望其功名氣節卓然表見者歟

臣請

敕部查議待士之禮悉遵

世祖皇帝舊制除諸生果有抗糧犯法者仍申學道嚴
行究革外其餘貪酷官吏凌蔑誣陷之風宜痛行
禁止如有仍前擅恣包庇借端辱士督撫立行叅

究倘督撫徇縱事發一併議處如是則苗莠辨而
士氣伸學校重而人才出

國家收尊賢敬士之報奕世無替矣蓋士爲四民之
首

皇上愛民必先愛士以臣區區之心欲爲

朝廷重教養非僅爲諸生惜體貌也如果臣言可採
伏望

睿鑒施行

請卹建言疏

爲請卹建言獲罪諸臣以勵忠直之氣收治平之
效事切唯水旱災異何代無之唯

聖主憂勤之念遇災加儆不靳下罪已之詔求言納諫
務臻至治斯天心鑒格而民物永安矣然天下正
直敢言之士常少而浮沉取容之輩恒多非有以
作忠直之氣而感發其廉耻則必以庸碌隱忍能
保富貴者爲得計孰肯奮不顧身以觸邪指佞爲
耑責乎臣伏觀前代建言諸臣或一時獲罪流貶

然不旋踵卽賜環名對其已故者必贈官葬祭卹其子孫故上雖嚴威莫測而犯顏直諫者不衰良以忠直之氣迫於中由恩義之感勵於上也吾

皇上臨御以來受言樂諫雖有慙激之辭未嘗深譴又屢頒

上諭俾言臣指實具奏雖古之懸鞞設鐸莫能過也然邇來水旱地震災異頻仍

皇上雖求言若渴而尚未見有忠謀至計允當

上心豈所以作直臣之氣勵其廉耻者尚有遺義歟

臣思

世祖皇帝時建言諸臣凡獲罪遷謫者咸蒙

赦還錄用唯是條議迺人一案當時因

功令初行利弊未顯而諸臣忠愛之心過於激切遂至有長流不返者今幸

皇上聖心洞察特允憲臣公疏遂回二十餘年久沿之成案以救天下億萬生民將

世祖皇帝在天之靈實式憑之矣夫全一迯人也憲臣言之於後適逢

皇上雨露之施而膏澤沛於兆庶諸臣言之於前適犯
世祖皇帝雷霆之震而身命畢於遐方是諸臣之言雖
有當否而忠愛之心如出一轍

皇上既錄現在之忠謨併當

念前時之狂瞽亟

敕部臣查明當日建言被謫諸臣存者

召還錄用歿者亦許歸葬故里加以贈卹如是則
不唯忠魂義骨感激於九原而今日之守官待罪
者亦將慕鳴鳳而耻寒蟬昌言不諱謬成風永

致太平長治之庥矣

臣因請卹建言事理字多逾

格伏乞

睿鑒統覽施行

廣西瘴厲甚重疏

爲廣西瘴厲甚重仕宦死亡可憫乞

敕部酌議就近遴補之法以恤人才而收實效事切

四方風土唯廣西素多瘴厲中原西北之人仕宦

其地者多染疾致斃生還十僅二三臣閱邸報見

撫臣馬

題稱數年來大小各官物故不下數百餘人深可

傷憫夫臣子受

朝廷一命之寄咸思建立功名榮歸故土若客死窮

鄉魂棲異域雖人臣盡忠之義固不容辭而揆諸
仁主愛惜人才撫養地方之計當不忍出此矣考古
粵西數郡原係罪人遷謫之鄉其人法當殊死
朝廷宥而遣之故危亡有所不恤今以有用無罪之
人選授彼地方拜官之日已有畢命之憂雖作邊
俸優陞而病斃接踵安望其寬心整理爲

國家綏養百姓乎臣思風土相近之處其人必可久
處廣西密邇湖南廣東等處生長斯地者素相習
服必無瘴厲之虞今後倘廣西缺出卽令就近選

補則宦遊者不患暴亡而地方又得久任之吏不
致新舊迎送苦累小民似於愛惜人才撫養地方
之義不無小補也如果臣言可採伏乞

敕部詳議施行

科場貼卷可憫疏

爲科場貼卷過多人
才困厄可憫恭請
敕部查復舊例以光大典事切我

皇上嘉意人文單

恩廣額又

允禮臣所請更定科場條例凡從前立法過嚴者咸酌裁至當矣唯是場中試卷不合式者固應貼示而從中亦有字畫稍誤抬頭小錯之類舊例免貼者近因

功令較嚴監試諸臣唯恐失察取咎遂將織毫舛錯
槩行貼出如已酉科直省鄉試俱貼至數千卷謄
送內闈者僅及其半多有文藝至佳以小誤不錄
者雖云恪遵新例而人才未免過屈矣臣思
國家設科原期廣拔才俊以備任使今不問其文章
工拙而先窘人於點畫微細之間似於

皇上寤寐求賢之意尚相左也查

世祖皇帝時每科貼卷甚少雖自丁酉科試官作弊防
察加嚴然大意原爲關節賄賂阻厄真才故痛繩

以法非謂微小錯誤當槩行不錄也今本年會試
場期已及臣恐監試諸臣相沿苛細遂致粘貼過
多士子有懷才莫展之憂內闈有卷不足收之嘆
詎所以光

大典乎臣請

敕部查照舊例除原不合式者仍行貼示外其餘或
筆畫小誤或抬頭稍錯之類諒免貼出以珍惜人
才則不唯士子三年攻苦千百里奔馳六晝夜嘔
心所作獲一經主司之目得失總荷

皇仁而

皇上特賜廣額之

盛心更俾典試諸臣得以博觀精選不致聊且充數
庶幾人才益盛

文治彌光矣

臣因

國家大典所關謬抒末議伏望

睿鑒俯擇施行

請別奏銷紳衿疏

為請別奏銷紳衿以昭激勸而廣

皇仁事

臣仰瞻

皇上憂勤儆惕諸凡脩省之實解網之

仁已罔不舉行周悉矣唯是江南奏銷一案因先
年頑鈍之輩抗糧逋賦不得已痛加褫黜以懲宿
弊誠救時之良法也但聞當日諸案中亦有貧無
寸土而為親族所株累者又有絲毫無欠而為胥
役所捏報者此類固可憫念即自干

功令之徒若事後果能悔罪求新急公奉法在

聖朝屢弘肆赦之條雖輿臺賤隸作奸犯科者咸蒙
昭雪豈有仕紳子衿顧忍令其終身罪廢之理况
此案歲月已久詎無惕然遷改而輸將恐後者若
莠苗不分同錮於

仁聖之世則遷善者何所勸而怙惡者何所懲似應
敕該督撫將前項紳衿逐縣確查自處分後何者完
糧最先何者輸課仍後其能補過者作何優復其
不悛改者作何治罪分別造冊具題以昭曠典

蓋澄察既往所以鼓舞將來而甄敘紳衿所以感
發庶族當亦

與朝風勵之機權於以敬迓天休至順也唯江南實
財賦之區亦人材之藪從來經理財用與鼓舞人
才當竝行不廢倘臣言可採伏望

敕部詳議施行

請禁妖言疏

爲請禁妖言僞術以肅法紀以杜隱憂事切查術
士妄言禍福律所首禁蓋小人託稱休咎最足搖
惑人心故雖遐方僻壤有挾左道以煽俗者猶禁
捕必嚴况

京師輦轂之地詎容奇邪妄人放言無忌以誑誘愚
俗乎臣聞近日外城江夏會館有朱方旦者原係
湖北撫臣董國興

題叅解

京之罪犯也雖其事之始末臣未能盡悉第聞長安

中官紳士庶奔走若狂祈問禍福者動以千百計

而其人亦儼然以神僊自處恣爲詭誕察其言辭

閃爍可駭臣思此人若果至誠前知則當抱道自

重絕遠趨附之人不應如此招搖多事若祇是市

井巫卜之流謬託神僊以鼓煽流俗則恐將來黨

類漸繁奸謀叵測萬一養成氣勢然後除之損傷

者衆矣况近日直省等處邪教餘孽猶未盡殄倘

或觀望興起轉相效慕豈世道人心之福乎臣歷

稽前代如少翁欒大王老志林靈素陶仲文之類

皆以符水幻術邀取寵榮一時朝士嗜進無耻者

咸倚附干求門庭如市卒之術無所驗旋皆誅譴

揆此可知迂怪之徒妄言欺世類無足信而况邪

說之害又有甚於此者乎臣請

敕部嚴行查議或將本人投逐遠方以禦魑魅不則

收羈內城深密之地勿令與外人交通以杜禍源

至其餘黨再行五城嚴加禁戢如有仍前借名誑

誘者卽拏送刑部按律究擬如此則法紀肅而人

心正奇邪息而風俗淳實爲億萬年治安之關鍵
矣臣從世道人心起見直抒狂慝伏望
睿鑒俯察施行

墾荒回籍安插疏

爲墾荒旣准回籍安插更宜慎詳請分效用歸農
之例以定人心以靖地方事切吾

皇上軫念投誠之衆資生無策

特允臣同官蕭震所請分遣各省墾荒以圖贍養旣
令增裕餉課亦俾安靖海隅誠

廟謨之至善者也乃行之未久而川湖督臣蔡某又
以此漕不諳耕種逃亾者多請聽其回籍自便復
奉

旨允行矣 臣思

皇上聽言納諫速於轉圜總欲俾投誠之衆各得其所
咸含哺鼓腹於

堯天舜日之下耳第人生氣質不同地方情形亦異
此千萬人之中固有悔罪求新自甘力田以終身
者亦有負才尚氣猶思立功以自顯者今概無分
別悉令縱還是使狡悍之徒與愚弱之輩咸聚處
故鄉共事南畝乎恐於勢猶有所未便也蓋人各
有能不能彼遷居外省旣以不諳耕種爲辭者豈

旋歸故土復肯以力田爲事歟况此輩平居多縱
橫閭左一旦失勢來歸恐怨家讐人乘時報復必
惴惴焉有不敢寧居之意而且密邇海濱其游魂
竄伏者未必無招搖鼓煽之術萬一潛相勾引鷹
眼復萌則熟蹊舊徑何可悉防也 臣請

敕該督撫將回籍者細核實數通行驗閱內有才技
優長膂力驍健者雖經繳劄仍准酌量分送各省
督提隨標效用果老弱愚懦者許其歸農復業仍
令本籍隣佑互相保結再行曉諭各州縣人民一

概不許懷挾夙讐私相報復如是則鴛鴦者既開
以功名之門耕鑿者復享其身家之樂卽有奸謀
萬輩無所逞其誑誘不唯東南半壁從此永寧將
見臺灣餘孽亦皆釋甲來歸矣何則內間杜則賊
勢自亡彼亦安能久遁孤島耶臣思前此招徠非
易今茲安頓尤難與其事後更煩

睿慮不若及今先令消弭故謬陳一得之愚以祈採
擇伏乞

救部議施行

漕輓遲速疏

爲漕輓之遲速難期

畿輔之蓄積宐廣請脩近郊倉儲以裕本計事臣聞

積貯者天下之大命

京師者天下之根本故古者國都所在必有數年之
蓄以備不虞而後凶荒不能爲患今

國家歲仰漕輓以贍

京師自按額支放而外未聞倉廩有數年之積近郊
有升斗之儲卽令比歲豐稔猶可深慮況今水旱

饑荒所在見告

皇上軫念窮黎漕糧業多改折卽輸運本色者又因黃
黃河決口未塞天妃閘一帶處處淺淤恐今漕艘
未必如期抵通凡

都城內外億萬人民日用米不下數十萬計將何策

以濟之

臣

思士庶家稍稱溫飽猶慮食指繁多豫

謀蓋藏矧

神京所在可云民食足支目前便謂晏然無虞耶臣
俯謁管窺唯有亟脩近郊倉儲之一法庶可稍佐

京通之未足耳考故明時近郊唯天津衛倉廩最
多儲米最廣其地距京密邇又切近河干轉輸

甚易第歲久不脩倉廩塌毀幾盡間存一二亦積

貯無幾

臣

愚謂宜及今脩繕完固另發

帑金於近省豐熟之處名糴米麥等項貯足一二年
之食則雖有水旱災傷而緩急可以常恃矣或謂
故明時儲米以饋關寧今關寧並不需米此倉何
庸復設殊不知臣
畿輔尤重於邊防

國儲更懸於軍餉

皇上愛育羣生雖偏州小邑猶脩復常平等倉積穀以防饑歲而况天津咫尺

神京足為滿漢官民所仰賴者乎倘非豫有所貯以防京通之不足萬一水旱不時漕渠偶梗此地之米價其堪騰踴否乎思及於此當不以臣之杞憂為過慮矣總之以京通為正額以津倉為副餘若遇外省歲歉米貴將漕糧量行改折以蘇民困而以津米抵兌京倉之數俟新漕至津仍行補額則

諸倉遞相轉輸儲米不致紅朽而畿輔常有數年之積此實根本民命之所關不可不亟圖者也臣從國計民生起見謬抒末議伏望

敕部議覆施行

男毓浩全較錄

毓湘

入藏室文集

卷三

三



